

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

1. गृहमंत्री अमित शाह होरें आखेआ ऐ जे नमें अपराधिक कनूनें दा मकसद सजा देना नेई सगुआं न्याह उपलब्ध करोआना ऐ।
2. केन्द्री मंत्री डॉ. जितेन्द्र सिंह होरें आखेआ ऐ जे दफा 370 हटाए जाने मगरा हुन जम्मू कश्मीर भारत दे भविक्ख दी विकास यात्रा च इक अगुआ बनियै उभरोग।
3. उपराज्यपाल मनोज सिन्हा होरें आखेआ ऐ जे उंदा प्रशासन जम्मू कश्मीर दे 13 लक्ख करसान परोआरें गी सशक्त बनाने लेई वचनबद्ध ऐ।
4. सरकारै पच्छमी पाकिस्तानी रिफ्यूजिएं ते 1965 दे विस्थापितें गी जमीनें सरबंधी अधिकार देने लेई ब्यौरेबार दिशा-निर्देश जारी कीते न। सरबंधत तैहसीलदारें गी एहदे लेई अख्तियार दित्ते गे न।

<><><><><><>

HM-Chabdigarh

केन्द्रीय गृहमंत्री अमित शाह होरें आखेआ जे हुन मुख्य दी आपराधिक न्यांह बवस्था च जबरदस्त सुधार होग जेहदे कन्नै लोकें गी तौले ते समें सिर न्यांह हासल होग। एह गल्ल उनें कल चंडीगढ़ च अपराधिक न्यांह उपकरणें गी बेहतर करने आस्तै ई-साक्ष्य न्यांह सेतु, न्यांह श्रुति ते ई-समन बवस्था दा उद्घाटन करने परेंत आक्खी। इस मौके पर उनें आखेआ जे नमें अपराधिक कनून भारत च ब्रिटिश राज्य दा दौर समाप्त करी दित्ता ऐ ते हुन एह कनून पूरी चाल्ली स्वदेशी बनी चुके दा ऐ। उनें आखेआ जे एह कनून साढ़े संविधान दे बिल्कुल अनुकूल न। एहदे कन्नै लोकें गी तौले न्यांह हासल होग। उनें एह बी आखेआ जे इस कनून च सजा दे बजाए न्यांह गी मता तरजीह दित्ती गई ऐ।

<><><><><><>

PM Gas

प्रधानमंत्री नरेन्द्र मोदी होरें देसै च रिकार्ड गैस उत्पादन दी सराहना कीती ऐ ते आखेआ ऐ जे विकसित भारत दे संकल्प गी हासल करने आस्तै ऊर्जा खेत्तर च आत्मनिर्भरता बड़ी मती महत्वपूर्ण ऐ। प्रधानमंत्री होरें एह गल्ल पेट्रोलियम मंत्री हरदीप सिंह पुरी हुंदी इक पोस्ट दे जवाब च आक्खी ऐ जेह्दे च दस्सेआ गेआ ऐ जे देशै नै गैस उत्पादन दे खेत्तर च इक नमां रिकार्ड हासल कीता ऐ। ब'रे 2020–21 च गैस दा उत्पादन 28.7 बीसीएम हा ते ब'रे 2023–24 च एह बधियै 36.4–3 बीसीएम होई गेआ ऐ। केन्द्रीय मंत्री होरें सांझा कीते गेदे आंकड़े च अंदाजा लाया गेआ ऐ जे 2026 च गैस दा उत्पादन 45.3 बीसीएम होई जाग। सोशल मीडिया दी इक पोस्ट च श्री मोदी होरें इस उपलब्धि लेई देश दे लोकें गी बधाई दित्ती ऐ। उनें आखेआ जे गैस उत्पादन च एह रिकार्ड इस दिशा च साढ़ी प्रतिबद्धता गी दर्शादा ऐ।

<><><><><><>

Dr. Jatinder Singh

केन्द्रीय मंत्री डॉ. जितेन्द्र सिंह होरें आखेआ ऐ जे दफा 370 हटने दे बाद जम्मू कश्मीर भारत दी भविष्य की विकास यात्रा च इक अगुआ दे तौर पर उभरियै सामने आंग। एह गल्ल उनें दफा 370 हटाए जाने की 5मीं ब'रेगंड दे मौके पर दूरदर्शन समाचार कन्ने इक खास इंटरव्यू च आक्खी। डॉ. सिंह होरें आखेआ जे पैहली बारी जम्मू कश्मीर दे कुदरती संसाधनें ते मनुक्खी साधनें—वसीलें गी जमीनी सतह पर सामने आहन्नेआ गेआ ऐ। उनें आखेआ जे एहदी सब्बने शा बड़्डी मिसाल भद्रवाह थमां पैदा होई की बैंगनी क्रांति यानि पर्पल रेवोल्यूशन ऐ जिन्ने भारत गी राई—बाई सरबंधी स्टार्टअप्स दे खेत्तर च प्रमुखता कन्ने अगगे आहन्नेआ ऐ ते भारत की अर्थ—बवस्था गी बी उबड़ा चुक्कने च योगदान दित्ता ऐ। पिछले 5ए ब'रें दिए उपलब्धिएं पर लोह पांदे होई उनें आखेआ जे जम्मू कश्मीर च 4 स्तरें—लोकतंत्र, सुशासन, विकास ते सुरक्षा स्थिति च बड़्डी ते सकारात्मक तब्दीलियां आइयां न।

<><><><><><>

Amarnath Yatra

दफा 370 गी हटाने की 5मीं ब'रेगंड दे चलदे श्री अमरनाथ यात्रा दे जत्थें गी अज्ज सुरक्षा कारणें करी जम्मू थमां रवाना नेई कीता गेआ ऐ। एह यात्रा जम्मू दे भगवती नगर आले आधार शिविर थमां रवाना नेई कीती की जे खूफिया जानकारी हासल होई की ही जे यात्रा पर आतंकवादी हमला होई सकदा ऐ। जम्मू दे अखनूर ते बन्ने आले इलाके च सुरक्षा बंदोबस्त होर निग्गर बनाए गे न। जम्मू दे आर.एस.पुरा च इक दिन गी मनाने लेई बीजेपी आस्सेआ इक व्यापक रैली दा सरिस्ता कीता जा'रदा ऐ जेह्दे च केन्द्रीय मंत्री जी.किशन रेउडी होर बतौर मुख परौहने शामिल होंगन। ओह जम्मू कश्मीर च विधानसभा चुनां सरबंधी प्रभारी बी हैन।

<><><><><><>

LG-Farmers

उपराज्यपाल मनोज सिन्हा होरें आखेआ ऐ जे उंदा प्रशासन जम्मू कश्मीर दे तकरीबन 13 लक्ख करसान परोआरें गी सशक्त बनाने लेई वचनबद्ध ऐ ते इंदे च तकरीबन 3 लक्ख गरीब ते लौहके करसान बी शामिल न। स्कास्ट कश्मीर दे शालीमार कैंपस च किसान उन्नति सम्मेलन दरान 500 किसान खिदमत घरें गी शुरू करोआने परेंत उनें आखेआ जे एह पैहलकदमी करसानें गी इक्कै थाहरै पर बक्ख-बक्ख चाल्ली दियां सुविधां ते सेवां हासल होई सकगंन। उनें दस्सेआ जे दुए गेड़ तैहत 1500 किसान खिदमत घर स्थापत कीते जांगन ते इंदा कम्म इस ब'रे दे खीरै तगर सबूरा करी लैता जाग। उपराज्यपाल होरें इस मौके पर किसान खिदमत घर मोबाइल ऐपलीकेशन बी शुरू करोआई जेहड़ी करसानें गी व्यापक सैहयोग ते मदाद देग।

<><><><><><>

Parliament

लोकसभा च अज्ज सेहत ते परिवार कल्याण मंत्रालय दी 2024-25 ब'रे दिएं ग्रांट मंगें पर अग्गे चर्चा होग। गोवा राज्य विधानसभा क्षेत्र सरबंधी अनुसूचित जनजाति दे नुमायंदगी बारे बिल गी बी अज्ज सदन च रखे जाने दी मेद ऐ। तोआई राज्यसभा च तेल क्षेत्र ते विनियम ते विकास सरबंधी तरमीमी बिल 2024 गी सदन च रखेआ जाग। उपरले सदन च राई-बाई मंत्रालय दे कम्में काजें पर चर्चा कीती जाग।

<><><><><><>

Ultrasound Machine

सेहत ते मैडिकल मैहकमा जम्मू दे निदेशक डॉ. राकेश मंगोत्रा होरें कठुआ दे महानपुर आले तरूमा सेंटर च भलेआं अज्जै कल्लै दी आधुनिक अल्ट्रासाउंड मशीन दा उदघाटन कीतां एहदे होने कन्नै महानपुर ब्लाक दे गरीब मरीजें गी लाह होग।

<><><><><><>

Refugees

राजस्व मैहकमे नै पच्छमी पाकिस्तानी रिफ्यूजिएं गी उंदी जमीनें दे मालिकाना हक देने ते 1965 दे विस्थापित लोकें गी स्टेट लैंड दे सरबंधे च मालिकाना हक देने मत्तल्लक ब्यौरेबार दिशा-निर्देश जारी कीते न। इस सरबंधे च प्रस्तावें गी हाल च गै उपराज्यपाल मनोज सिन्हा हुंदी प्रधानता आली प्रशासनिक काउंसल नै मंजूरी दिक्ती ऐ। पच्छमी पाकिस्तानी रिफ्यूजिएं गी मालिकाना हक देने लेई जारी राजस्व मैहकमे दे दिशा-निर्देशें च आखेआ गेआ ऐ जे उंदे कश सरकारी जिमीं मत्तल्लक राजस्व रिकार्ड दी अमल कापी जां फही अक्टूबर 2018 च

सरकारी हुक्मे तैह्त थ्होई दी माली मदाद दी रसीद दी कापी होनी लोड़चदी ऐ। दिशा निर्देशं मूजब मुंसिपल कारपोरेशन जां मुंसिपल कमेटी दे हद्द अंदर औने आली सरकारी जिमीं पर मालकाना हक कुसै सूरतै च नेई दित्ते जांगन। डिप्टी कमीशनरें गी इस सरबंधै च जमाबंदिएं दी रिपोर्ट हर म्हीने डिवीजनल कमीशनर जां राजस्व मैह्कमे दे माली कमीशनर होरें गी जमा करोआनी होग।

<><><><><><>

CDS

चीफ ऑफ डिफेंस स्टाफ जनरल अनिल चौहान होर अज्ज नमीं दिल्ली च त्रौनें सेनाएं दे वित्तीय सम्मेलन दी अध्यक्षता करगंन। एह्दा मकसद सशस्त्र सेनाएं दे माली मुद्दें च तालमेल बठाना ऐ। बैठक च रक्षालेखा महानिदेशक, रक्षा मंत्रालय दे वरिष्ठ अधिकारी हिस्सा लेंगन। सम्मेलन दरान रक्षा सरबंधी माली मामले च बक्ख-बक्ख सरबंधी घडें दे नजरियै ते रक्षा खरीद च औने आली चुनौतिएं दा हल तलाशे जाने पर बचार बमर्श होग।

<><><><><><>

Budda Amarnath

श्री बाबा बुड्डा अमरनाथ जी दी 10 रोजा यात्रा पुंछ जिले च लोरन घाटी च 7 अगस्त थमां शुरू होग ते 19 अगस्त गी रक्खड़ पुन्नेआ आले दिन सम्पन्न होइ जाग। आकाशवाणी जम्मू संवाददाता दी रिपोर्ट मूजब जम्मू दे भगवती नगर आले आधार शिविर थमां इस यात्रा दा पैह्ला जत्था 6 अगस्त यानि कल रवाना होग। श्रद्धालुएं लेई सारे इंतजाम कीते गेदे न। पुंछ दे डिप्टी कमीशनर यासीन एम. चौधरी होरें मुत्तलका मैह्कमें गी आखेआ ऐ जे ओह यात्रा पर औने आले सारे श्रद्धालुएं लेई लोड़चदे इंतजाम जकीनी बनान तां जे यात्रा सुचारू ते रमानदारी आले ढंगै सिर सम्पन्न होई सकै।

<><><><><><>

Trishul Yatra

पुंछ दे लोकें आस्सेआ सलाना बुड्डा अमरनाथ यात्रा दे सरबंधै च इक त्रिशूल यात्रा दा सरिस्ता कीता गेआ। एह्दी शुरूआत त्रिशूल पूजन कन्नै होई। इस मौके श्रद्धालुएं दा खासा रश दिक्खेआ गेआ। त्रिशूल यात्रा नव गृह मंदर थमां शुरू होई ते बक्ख-बक्ख थाहरें थमां हुंदे होई निकली। इस यात्रा गी लेइयै श्रद्धालुएं च खासा उत्साह दिक्खेआ गेआ।

<><><><><><>

Machail Mata

जंदी 25 जुलाई थमां शुरु होई दी पवित्र श्री मचेल माता यात्रा दरान अजें तोड़ी 50 ज्हार शा मते श्रद्धालु पवित्र मंदरै च मत्था टेकी लैता ऐ। कल 8 ज्हार 535 श्रद्धालुएं मचेल पाङ्डर दे पवित्र मंदरै च दर्शन कीते न। जम्मू खित्ते च श्री माता वैष्णो देवी जी दी यात्रा दे बाद मचेल माता यात्रा दूई सब्बने शा बड्डी यात्रा ऐ। मचेल माता जी दी पवित्र छड़ी यात्रा औंदी 17 अगस्त गी जम्मू थमां दरबार लेई रवाना होग। किशतवाड़ दे डिप्टी कमीशनर डॉ. देवांश यादव होरें श्रद्धालुएं गी आग्रह कीता ऐ जे ओह ऑनलाइन पंजीकरण करोआने ते मौसम, रस्ते ते होरने सुविधाएं दी जानकारी हासल करने लेई वेबसाइट <https://shrimachailmatayatra.com> पर जान।

<><><><><><><>

Sampoorna

रामबन जिले दे खैरी ब्लाक च सम्पूर्णता अभियान चलाया जा'रदा ऐ। एहूदा मुख्क मकसद केन्द्र प्रयोजित बक्ख-बक्ख स्कीमें दा लाह लाभार्थिं ते आप सहायता समूहें गी पजाना ऐ। खैरी ब्लाक दी 12 पंचैते च 200 आप सहायता समूह न। महिलाएं दे 150 समूहें गी 15 ज्हार रपे दी राशि प्रोत्साहन दे तौर पर दिक्ती गई ऐ।

<><><><><><><>